

Rezumu: Arte Nia Funksaun iha Mudansa Sosiál iha Timor-Leste

Sra Kim Dunphy nia teze-doutoramentu,
Universidade Deakin, Melbourne, Australia.
Halo kompletu iha fulan Outubru tinan 2013.
Kim.dunphy@manyhands.org.au

Teze ida ne'e haree ba arte nia funksaun iha prosesu kria mudansa sosiál iha Timor-Leste. Deste dékada 1970, grupu oi-oin uza arte atu azuda halo mudansa sosiál. Buat ne'e akontese iha rai riku no mós rai kiak. Iha dékada ikus ne'e, grupu oi-oin komesa mós uza arte atu halo mudansa sosiál iha Timor-Leste. Maibé grupu arte sira nia servisu barak la hetan avaliasaun diak no mós la iha dokumentasaun diak. Dala ruma mós susar atu sukat atividade arte nia rezultadu.

Tipu arte espesífiku ne'ebé inklui iha peskiza ida ne'e mak 'arte partisipativu'. Arte partisipativu mak bainhira membru komidade partisipa iha atividade arte ho objetivu atu halo mudansa sosiál.

Teze ida ne'e halo avaliasaun kona-ba programa arte partisipativu lima iha Timor-Leste. Programa lima ne'e mak hanesan tuir mai: Istória Timor, kompetisaun hakerek istória badak iha Dili; Arte Moris nia eskola arte iha Dili; Ba Futuru nia program teatru ho naran *Scared Cool* iha Dili; Afalyca – Sentru Arte Komidade iha Baucau; no Gillian Howell nia programa múziku komidade iha Lospalos.

Avaliasaun ne'e hatudu katak programa hotu-hotu hetan rezultadu pozitivu. Programa nia partisipante no mós ema seluk hetan esperiénsia pozitivu, liu-liu iha parte kultura, sosiál, no sente laran haksolok. Partisipante sira sente kontente ho sira nia involvimentu, liu-liu bainhira atividade haforsa sira nia ligasaun ho Timor nia kultura tradisionál. Atividade sira mós dudu partisipante no audénsia atu aprende buat foun, inklui hanoin kreativu no hanoin analiza. Buat ne'e mak mudansa prinsipál liu tanba bainhira ita bele hanoin ho kreativu ita hetan rezultadu pozitivu oi-oin loos. Programa arte, hanesan programa ne'ebé inklui iha avaliasaun ne'e, fó benefísiu diak tanba fó partisipante Timor oan oportunidade formál atu halo dezvoltamentu kreativu. Oportunidade hanesan ne'e oituan deit iha Timor. Programa nia partisipante no lideransa ne'ebé envolve ativu iha atividade kreativu hetan benefísiu barak duni. Porezemplu, partisipante joven sira husi estudu kazu iha Arte Moris, Afalyca no *Scared Cool*, hetan oportunidade diak husi sira nia involvimentu, hanesan aumenta sira nia rede sosiál no profesionál; dezvoltolve abilidade arte, negósiu no jestaun; bele sai ba rai liur; no hetan rekoñesimentu internasional ba sira nia arte.

Iha parte sosiál, programa arte nia partisipante dezvoltolve ligasaun forte ho ema seluk. Ita haree katak buat ne'e importante tebes tanba partisipante barak hetan esperiénsia trauma sosiál ne'ebé halo impaktu negativu ba sira nia relasaun sosiál durante tempu naruk. Iha parte siviku, ita bele haree rezultadu katak bainhira ema partisipa iha arte, buat ne'e kontribui ba dezvoltamentu komidade ne'ebé moris hakmatek. Partisipante balun mós hetan benefísiu iha parte ekonómiku liu husi dezvoltolve abilidade foun, aumenta oportunidade hetan servisu, no manán osan liu husi faan arte. Programa arte rua fó benefísiu mós iha parte ambiente liu husi halo atividade ne'ebé aumenta komidade nia koñesimentu kona-ba kestaun ambiente nian.

Ema seluk mós hetan rezultadu pozitivu husi programa arte, inklui grupu arte nia lideransa, membru comunidade ne'ebé la partisipa iha programa, no mós bainaka balun. Lideransa sira hato'o katak sira hetan mudansa pesoál no mós mudansa profesionál. Ema iha audénsia ka ema ne'ebé vizita programa arte sente kontente tanba bele hola parte. Sira mós sente kontente tanba bele haklean sira nia komprensaun kona-ba sira rasik nia esperiénsia moris no mós ema seluk nia esperiénsia moris liu husi haree arte no teatru. Iha mós relasaun entre ema lokál no ema husi rai liu ne'ebé sai forte liu tan tanba servisu hamutuk iha program arte sira ne'e. Rezultadu ida ne'e importante tanba iha Timor-Leste ema oituan deit mak hetan oportunidade atu partisipa iha treinamentu profesionál. Nune'e kontribuisaun husi ema rai liur azuda aumenta ema nia abilidade profesionál.

Parte ne'ebé susar mak oinsa atu hatene se atividade arte sira ne'e kontribui duni ba mudansa sosiál iha comunidade ka lae. Iha buat balun ne'ebé hatudu rezultadu pozitivu direktamente no mós rezultadu pozitivu la direktamente iha comunidade no sosiedade. Porezemplu problema iha família laran no iha comunidade menus no mós ema barak halo ligasaun pozitivu ho mundu boot. Iha evidénsia ne'ebé hatudu katak partisipante iha programa arte hotu-hotu aprende buat foun no dezenvolve sira nia a'an rasik liu husi sira nia involvimentu iha programa. Maske karik la direktamente, programa sira halo kontribuisaun pozitivu ba mudansa sosiál, liu husi fó abilidade no informasaun ba ema individu ne'ebé uza buat ne'e iha sira nia moris loron-loron. Iha kazu balun mós ema individu sira foti papél nudar lideransa iha sira nia organizaun ka sira nia comunidade. Roger (2003) nia teoria kona-ba hafahe inovasaun (*diffusion of innovation theory*) observa katak lideransa arte no partisipante iha programa arte bele fó impaktu ba comunidade jerál tanba razaun rua. Primeiru, ema barak liu koñese sira no segundu, sira iha asesu diak liu ba media no jornalista liu husi sira nia partisipasaun iha programa arte. Ha'u nia observaun ba programa arte sira nia durante tinan balun hatudu katak iha duni rezultadu pozitivu ba partisipante individu no mós ba sira nia comunidade. Maske nune'e, prezisa halo tan investigasaun ne'ebé tau foku ba programa arte nia objetivu spesífiku hodi hetan informasaun klean liu.

Maske programa nia rezultadu pozitivu tebes, iha mós risku no perigu balun. Dezafiu ida mak iha área lideransa, liu-liu kona-ba oin transfere abilidade no aumenta kapasidade. Dezafiu ne'e mosu tanba tensaun entre buat rua, iha parte ida programa sira prezisa azuda husi ema profesionál, iha parte seluk programa hakarak partisipante sira sente katak atividade ne'e sira nian duni no sira bele aumenta poder liu husi sira nia partisipasaun. Kestaun ida ne'e mosu ba organizaun hotu-hotu. Dezafiu ida tan ne'ebé mosu iha estudu kazu barak mak feto oituan deit mak partisipa. Buat ne'e hatudu katak programa sira prezisa buka maneira oinsa para fó enkorajen ba feto atu partisipa.

Iha mós possibilidade katak programa arte sira la kria mudansa sosiál, ka kria mudansa sosiál ne'ebé la pozitivu, kuandu la iha kolaborasaun forte entre lideransa arte no ema profesionál sira ne'ebé hatene kona-ba oinsa halo mudansa sosiál pozitivu. Dezafiu ne'e boot tanba ema profesionál ne'ebé involve iha programa arte sira oituan deit mak iha abilidade spesífiku ba sira nia programa mudansa sosiál. To'o agora mós Timor oan ne'ebé profesionál kona-ba arte oituan deit mak bele fó konsellu ba programa arte sira ne'e. Bainhira programa nia lideransa la dun iha abilidade ne'ebé apropriadu, bele hetan rezultadu katak la uza rekursu ho diak, ka bele mós kria problema. Iha mós impaktu negativu balun husi atividade arte balun, hanesan impaktu ba ambiente bainhira ema husi rai liur sai aviaun hodi mai involve iha programa. Fatór hanesan ne'e prezisa inklui kuandu atu halo avaliaun kompletu tebes.

Maske rezultadu sira ne'e bazeia ba estudu kazu iha Timor-Leste, rezultadu ne'e konfirma katak programa arte partisipativu iha fatin seluk bele mós kria mudansa sosiál pozitivu. Programa bele kria mudansa sosiál pozitivu liu-liu se sira halo tuir prinsípiu ba hahalok efeitu. Iha teoria balun kona-ba mudansa ne'ebé mai husi área psikolojia (Ajzen & Fishbein, 2005) no área dezvoltamentu (Hickey & Mohan, 2004). Teoria sira ne'e hato'o rekomendasaun katak diak liu bainhira programa involve iha prosesu mudansa sosiál jerál. Teoria sira ne'e apropiadu mós ba programa arte partisipativu. Programa ne'ebé inklui oportunidade ba lideransa arte atu servisu hamutuk ho ema seluk ho abilidade espesífiku kona-ba asaun sosiál, muda hahalok, edukasaun comunidade no psikolojia, bele halo impaktu diak loos iha comunidade. Maibé, programa arte partisipativu bele mós fó azuda jerál tanba sira bele fó impaktu iha área oi-oin. Programa arte bele fó impaktu iha área hanesan: halo asaun sosiál ne'ebé fó influensia ba lideransa no ema ne'ebé hakerek polítika, servisu dezvoltamentu kultura comunidade ne'ebé bolu hamutuk ema oi-oin hodi haree ba kestaun ne'ebé involve sira hotu, no mós uza arte iha kontestu psikolojia hodi azuda ema iha nivel individu.

Iha konkluzan, ha'u nia avaliaun hatudu katak programa arte partisipativu iha Timor-Leste kontribui ba mudansa pozitivu ho ema oi-oin, liu-liu ho partisipante. Ema seluk hetan mós mudansa pozitivu, inklui lideransa arte nian, organizaun ne'ebé hala'o programa, partisipante nia família no comunidade jerál. Iha fatór balun ne'ebé signifika katak prosesu mudansa ne'e hetan susesu no mós ema gosta partisipa iha arte partisipativu. Fatór sira ne'e inklui halo buat ida ho kreatividade, oportunidade servisu hamutuk, no esperiénsia aprende ne'ebé pozitivu. Fatór importante loos mak programa iha lideransa ho abilidade diak. Lideransa arte nian ne'ebé sai hanesan ezemplu ba sira nia partisipante hetan susesu diak liu no hetan mudansa barak liu. Esperiência ne'ebé forte liu mak ho atividade ne'ebé uza kostume kultura tradisionál no kahur ho ideia foun, no mós bolu hamutuk ema oi-oin.

Teze kompletu bele hetan ho lian Ingles husi:

http://manyhands.org.au/uploads/files/Kim_Dunphy_PhD_thesis_final_submitted_29.10.13.pdf